



18 “ ОКТЯБРЬ ” 2017 й. г. № 846

Тошкент ш. – г. Ташкент

**Собиқ Ўзбекистон Қишлоқ хўжалиги фанлари академиясининг  
хақиқий аъзолари ва мухбир аъзоларини қўллаб-қувватлашни  
янада кучайтириш чора-тадбирлари тўғрисида**

Ўзбекистон Республикаси Президентининг “Собиқ Ўзбекистон Қишлоқ хўжалиги фанлари академиясининг хақиқий аъзолари ва мухбир аъзоларини рағбатлантириш чора-тадбирлари тўғрисида” 2017 йил 10 августдаги ПФ–5146-сон Фармониға мувофиқ, собиқ Ўзбекистон Қишлоқ хўжалиги фанлари академиясининг хақиқий аъзолари ва мухбир аъзоларининг саломатлигини мустаҳкамлаш ва уларни ижтимоий қўллаб-қувватлашни янада кучайтириш мақсадида Вазирлар Маҳкамаси қарор қилади:

1. Собиқ Ўзбекистон Қишлоқ хўжалиги фанлари академиясининг хақиқий аъзолари ва мухбир аъзоларининг саломатлигини санаторий-соғломлаштириш ҳамда курорт-соғломлаштириш муассасаларида мустаҳкамлаш тартиби тўғрисидаги низом 1-иловаға мувофиқ тасдиқлансин.

2. Вазирлар Маҳкамасининг “Ўзбекистон Республикаси фанлар академиялари аъзоларининг гонорарлари, докторантлар ва аспирантларнинг стипендиялари миқдорини ошириш тўғрисида” 1994 йил 1 декабрдаги 578-сон қарорига 2-иловаға мувофиқ ўзгартириш киритилсин.

3. Ўзбекистон Республикаси Қишлоқ ва сув хўжалиги вазирлиги, манфаатдор вазирликлар ва идоралар ўзлари қабул қилган норматив-ҳуқуқий ҳужжатларни бир ой муддатда ушбу қарорға мувофиқлаштирадилар.

4. Мазкур қарорнинг бажарилишини назорат қилиш Вазирлар Маҳкамасининг Қишлоқ ва сув хўжалиги, қишлоқ хўжалиги маҳсулотларини қайта ишлаш ҳамда истеъмол товарлари масалалари, Таълим, илм-фан ва ёшлар сиёсати масалалари ҳамда Соғлиқни сақлаш, экология, атроф муҳитни муҳофаза қилиш, жисмоний тарбия ва спорт масалалари ахборот таҳлил департаментларига юклансин.

Ўзбекистон Республикасининг  
Бош вазири



А. Арипов



**Собик Ўзбекистон Қишлоқ хўжалиги фанлари  
академиясининг ҳақиқий аъзолари ва мухбир аъзоларининг саломатлигини  
санаторий-соғломлаштириш ҳамда курорт-соғломлаштириш  
муассасаларида мустаҳкамлаш тартиби тўғрисидаги  
НИЗОМ**

**1-боб. Умумий қоидалар**

1. Мазкур Низом Ўзбекистон Республикаси Президентининг “Собик Ўзбекистон Қишлоқ хўжалиги фанлари академиясининг ҳақиқий аъзолари ва мухбир аъзоларини рағбатлантириш чора-тадбирлари тўғрисида” 2017 йил 10 августдаги ПФ–5146-сон Фармониға мувофиқ собик Ўзбекистон Қишлоқ хўжалиги фанлари академиясининг ҳақиқий аъзолари ва мухбир аъзолари (кейинги ўринларда Академия аъзолари деб аталади) ва уларнинг кузатувчлари саломатлигини санаторий-соғломлаштириш ва курорт-соғломлаштириш муассасаларида мустаҳкамлаш тартибини, шу жумладан уларни соғломлаштириш шарт-шароитлари ва муддатларини, йўлланмаларни ажратиш ва молиялаштириш тартибини белгилайди.

2. Ўзбекистон Республикаси Президентининг “Собик Ўзбекистон Қишлоқ хўжалиги фанлари академиясининг ҳақиқий аъзолари ва мухбир аъзоларини рағбатлантириш чора-тадбирлари тўғрисида” 2017 йил 10 августдаги ПФ–5146-сон Фармониға мувофиқ, Академия аъзолари бир нафар кузатувчи билан бирга йилига бир марта ўзлари учун мақбул бўлган муддатда Ўзбекистон Республикаси Соғлиқни сақлаш вазирлиги, Ўзбекистон Қасаба уюшмалари Федерацияси, давлат ва хўжалик бошқаруви органларига қарашли санаторий-соғломлаштириш муассасаларида ҳамда Ялта ва Кисловодск шаҳарларидаги “Ўзбекистон” курорт-соғломлаштириш акциядорлик жамиятининг санаторийларида (кейинги ўринларда санаторийлар деб аталади) соғломлаштириш курсидан бепул фойдаланиш ҳуқуқига эга.

Кузатувчи сифатида биринчи навбатда Академия аъзоларининг яқин қариндошлари бўлиши мумкин. Агар яқин қариндошлари бўлмаса, соғломлаштириш курсидан ўтувчи Академия аъзоси томонидан Ўзбекистон Қишлоқ хўжалиги илмий-ишлаб чиқариш маркази (кейинги ўринларда Марказ деб аталади) билан келишилган ҳолда тақлиф этилган шахс кузатувчи бўлиши мумкин.

3. Академия аъзолари ҳамда уларнинг кузатувчиларини санаторийларга юбориш ушбу Низомнинг 1-иловасидаги схемаға мувофиқ амалға оширилади.

4. Академия аъзолари ҳамда уларнинг кузатувчи шахслари санаторийларда соғломлаштириш курсини Академия аъзолари томонидан ўзларига мақбул бўлган муддатларни кўрсатган ҳолда берилган аризаларға асосан Вазирлар Маҳкамаси томонидан ҳар йили тасдиқланадиган йўлланмаларни тақсимлаш режасига мувофиқ ўтайдилар.



## 2-боб. Йўлланмалар олиш учун мурожаат қилиш

5. Академия аъзолари кейинги йилга санаторийга йўлланма олиш учун ҳар йили 1 сентябргача Марказга қуйидаги ҳужжатларни тақдим этадилар:

ушбу Низомнинг 2-иловасида келтирилган шакл бўйича ариза;

паспорт нусхаси;

Ўзбекистон Қишлоқ хўжалиги фанлари академиясининг ҳақиқий аъзолигини ёки муҳбир аъзолигини тасдиқловчи гувоҳнома нусхаси;

кузатувчининг шахсини тасдиқловчи ҳужжат;

Марказга тақдим этилган ҳужжатлар ушбу Низомнинг 3-иловасига мувофиқ "Йўлланмалар сўраб ёзилган аризаларни рўйхатга олиш дафтари"да рўйхатдан ўтказилади.

6. Йўлланма унда кўрсатилган муддатда ҳақиқий ҳисобланади.

Академия аъзолари саломатлигининг ҳолатига ёки бошқа асосли сабабларга кўра йўлланмадан белгиланган муддатда фойдаланиш имкониятига эга бўлмаган тақдирда, йўлланманинг амал қилиш муддати тугашидан камида икки ҳафта олдин Марказга мурожаат қилиб, йўлланма муддатини йил якунига қадар ўзгартиришлари мумкин. Йўлланмада кўрсатилган муддатларни календарь йил мобайнида икки мартадан ортиқ кўчиришга йўл қўйилмайди.

7. Марказ саломатликни тиклаш муддати кўрсатилган ҳолда ариза берган шахслар рўйхатини шакллантиради ва ҳар йили 10 сентябргача Ўзбекистон Республикаси Соғлиқни сақлаш вазирлигига тақдим этади.

## 3-боб. Соғломлаштириш йўналишларини аниқлаш

8. Ўзбекистон Республикаси Соғлиқни сақлаш вазирлиги Марказ томонидан тақдим этилган рўйхатни олгандан кейин уни беш иш куни мобайнида Академия аъзоларининг доимий яшаш жойидаги тиббиёт муассасаларига етказилади.

9. Тиббиёт муассасалари тақдим этилган рўйхатлар бўйича бир ой муддатда Академия аъзоларини бепул диспансеризациядан ўтказиладилар ва унинг натижаларига кўра санаторийда соғломлаштиришнинг зарур йўналишини аниқлайдилар.

10. Академия аъзоларини диспансеризациядан ўтказиш натижалари асосида унинг тиббий картасида санаторийда соғломлаштиришнинг зарур йўналиши ва зид кўрсатмалар (улар мавжуд бўлганда) кўрсатилган ҳолда тегишли ёзув қайд этилади.

11. Тиббий картадаги ёзув асосида тиббиёт муассасаси Академия аъзоларига белгиланган шаклдаги санаторий-курорт картасини расмийлаштиради ва ушбу карта йўлланма олиш учун асос ҳисобланади.

Зарурат бўлганда, Академия аъзоларининг саломатлигида ўзгаришлар юз берган тақдирда санаторий-курорт картасига тузатишлар киритилиши мумкин.



12. Ўзбекистон Республикаси Соғлиқни сақлаш вазирлиги:

тиббиёт муассасаларидан ҳар йили 25 октябргача диспансеризациядан ўтган Академия аъзоларининг соғломлаштириш йўналишларини ва санаторийлар номларини кўрсатган ҳолда тузилган рўйхатини олади;

беш иш куни мобайнида рўйхатни Марказга тақдим этади.

#### **4-боб. Йўлланмаларни тақсимлаш ва ажратиш**

13. Тиббиёт муассасаси раҳбари Академия аъзоларини диспансеризациядан ўтказишнинг белгиланган муддатларида таъминланиши, шунингдек, тиббий ва санаторий-курорт картасида соғломлаштиришнинг зарур йўналиши тўғрисидаги ёзувларнинг ҳаққонийлиги учун шахсан жавоб беради.

14. Марказ Ўзбекистон Республикаси Соғлиқни сақлаш вазирлиги тақдим этган рўйхат асосида ҳар бир санаторий бўйича келгуси йил учун йўлланмаларни тақсимлаш режасини ишлаб чиқади ва санаторийларнинг юқори турувчи вазирликлари, идоралари ва ташкилотлари билан келишилган ҳолда 15 ноябргача Вазирлар Маҳкамасига тасдиқлаш учун киритади.

15. Марказ йўлланмаларни тақсимлаш режаси тасдиқлангандан сўнг уни ўн иш куни мобайнида санаторийларга етказиши, йўлланмаларни расмийлаштиради ва уларни Академия аъзоларига етказилишини таъминлайди.

Зарурат бўлганда, йил мобайнида йўлланмаларни тақсимлаш режасига асосли сабаблардан (тиббий кўрсатма, рад этилиши ва бошқа асосли сабаблар) келиб чиққан ҳолда, ўзгартиришлар киритилиши мумкин. Ўзгартиришлар Марказ томонидан тегишли санаторийларнинг юқори турувчи вазирликлари, идоралари ва ташкилотлари билан келишилган ҳолда киритилади.

Бунда Марказ ҳар ойнинг 30-санасига қадар санаторийлар томонидан ўринлар ажратиши учун тузатишлар киритилган параметрларни санаторийларга етказиши.

16. Йўлланмалар босмаҳона усулида босилган, тартиб рақамига эга бўлган махсус бланкаларда ва Академия аъзоси учун йўлланма” сўзлари ёзилган тегишли штамп билан тасдиқланади ҳамда уларда қайтарма талон бўлиши шарт.

17. Марказ конун ҳужжатларида белгиланган тартибда йўлланмалар реестрини юритади.

18. Марказ йўлланмаларни тақсимлаш режасига мувофиқ ҳар йили 15 январгача санаторийлар билан Академия аъзоларини соғломлаштириш юзасидан шартномалар тузади.

19. Санаторийлар тузилган шартномаларга мувофиқ Академия аъзолари ҳамда уларнинг кузатувчи шахсларини қабул қилинишини таъминлайдилар.

20. Санаторийлар раҳбарлари тузилган шартномалар шартлари тўлиқ бажарилишига, шунингдек кўрсатиладиган хизматлар сифати учун шахсан масъулдирлар.

#### **5-боб. Санаторийларга йўлланмаларни молиялаштириш**

21. Академия аъзолари ҳамда уларнинг кузатувчилари саломатлигини мустаҳкамлаш учун харажатларни молиялаштириш Ўзбекистон Қишлоқ хўжалиги илмий-ишлаб чиқариш маркази харажатларининг белгиланган тартибда рўйхатдан ўтказилган сметасида йўлланмалар учун тўловга ҳар йили мақсадли тартибда назарда тутиладиган бюджетдан ажратиладиган маблағлар ҳисобидан амалга оширилади.

22. Санаторийлар ҳар ойнинг 5-кунигача ўтган ойда Академия аъзолари ҳамда уларнинг кузатувчи шахслари амалда фойдаланган йўлланмалардан келиб чиқиб, бажарилган ишлар далолатномалари ва ўзаро ҳисоб-китобларнинг таккослаш далолатномаларини Марказга тақдим этиб, ҳисоб-китобларни амалга оширадилар.

Марказга тақдим этиладиган маълумотларнинг ишончилиги ва асосланганлиги учун санаторийлар раҳбарлари шахсан масъулдирлар.

#### **6-боб. Санаторийларда яшаш ва соғломлаштириш шартлари**

23. Йўлланмадан факат унда кўрсатилган Академия аъзоси фойдаланиши мумкин. Йўлланманинг бошқа шахсга берилишига йўл қўйилмайди.

Ушбу талаб кузатувчиларга нисбатан қўлланилмайди.

24. Санаторийга келган Академия аъзоларида паспорт, соғлиқни сақлаш муассасаси томонидан берилган санаторий-курорт картаси (тиббий хулоса) ва йўлланма бўлиши керак.

25. Академия аъзолари ҳамда уларнинг кузатувчиларига "стандарт" ётоқхоналардан жой берилади.

Академия аъзолари ҳамда уларнинг кузатувчилари санаторийлардаги мавжуд қўшимча хизматлар учун белгиланган тўловларни ўз ҳисобидан амалга оширган ҳолда фойдаланишлари мумкин.

26. Академия аъзолари ҳамда уларнинг кузатувчилари санаторийнинг даволовчи шифокори томонидан тайинлаган барча зарур тиббий муолажалар билан биринчи навбатда таъминланадилар.

27. Даволанишга келган Академия аъзоси ҳамда унинг кузатувчисига санаторий томонидан йўлланманинг қайтиш талони Марказга топшириш учун берилади.

Йўлланманинг қайтиш талонида тегишли шахснинг фамилияси, исми ва отасининг исми, санаторийда амалда бўлган вақти кўрсатилади.



28. Академия аъзоларига соғломлаштириш учун берилган йўлланмаларга мувофик санаторийларда жой ажратилиши юзасидан санаторийлар раҳбарлари шахсан жавоб берадилар.


#### **7-боб. Яқинловчи қондалар**


29. Академия аъзолари ҳамда уларнинг кузатувчиларига берилган ва улар томонидан фойдаланилган йўлланмалар бўйича ҳисоб-китоблар ва уларнинг назорати Марказ томонидан олиб борилади.

30. Марказ санаторий йўлланмаларининг ўз вақтида ва мақсадли берилишини таъминлайди.


Собиқ Ўзбекистон Қишлоқ хўжалиги  
фанлари академиясининг ҳақиқий аъзолари ва мухбир  
аъзоларининг саломатлигини санаторий-соғломлаштириш  
хамда курорт-соғломлаштириш муассасаларида  
мустаҳкамлаш тартиби тўғрисидаги низомга  
I-илова

Собиқ Ўзбекистон Қишлоқ хўжалиги фанлари академиясининг ҳақиқий аъзолари ва мухбир аъзоларини  
хамда уларнинг кузатувчиларини санаторийларга юбориш  
СХЕМАСИ









Собик Ўзбекистон Қишлоқ хўжалиги фанлари академиясининг ҳақиқий аъзолари ва мухбир аъзоларининг саломатлигини санаторий-соғломлаштириш ҳамда курорт-соғломлаштириш муассасаларида мустаҳкамлаш тартиби тўғрисидаги низомга  
2-илова

Ўзбекистон Қишлоқ хўжалиги илмий-ишлаб чиқариш маркази Бош директорига

\_\_\_\_\_ да яшовчи  
\_\_\_\_\_ дан  
(ариза берувчининг Ф.И.Ш.)

### АРИЗА

Менга \_\_\_\_\_ йил \_\_\_\_\_ ойига \_\_\_\_\_ санаторийсига  
(санаторийнинг номи)  
йўлланма ажратишингизни сўрайман.

Аризага қуйидагиларни илова қиламан:

паспорт нусхаси;

собик Ўзбекистон Қишлоқ хўжалиги фанлари академиясининг ҳақиқий аъзолигини (мухбир аъзолигини) тасдиқловчи гувоҳнома нусхаси;

кузатиб бораётган шахс паспортининг нусхаси.

Бошқа ҳужжатлар:

\_\_\_\_\_

Мурожаат қилувчининг имзоси: \_\_\_\_\_

Сана: 20\_\_ йил " \_\_ " \_\_\_\_\_

Аризани рўйхатдан ўтказувчи

\_\_\_\_\_ (аризани қабул қилган шахснинг Ф.И.Ш., лавозими)

Сана: 20\_\_ йил " \_\_ " \_\_\_\_\_





Вазирлар Маҳкамасининг  
2017 йил “18” ~~октябр~~даги ~~846~~ сон қарорига  
2-илова

Вазирлар Маҳкамасининг “Ўзбекистон Республикаси фанлар академиялари аъзоларининг гонорарлари, докторантлар ва аспирантларнинг стипендиялари миқдорини ошириш тўғрисида” 1994 йил 1 декабрдаги 578-сон қарорига киритилаётган ўзгартириш

1. Илованинг матни қуйидаги таҳрирда баён этилсин:

“Ўзбекистон Республикаси Фанлар академиясининг ҳақиқий аъзолари, собиқ Ўзбекистон Қишлоқ хўжалиги фанлари академияси ҳақиқий аъзолари ва мухбир аъзоларининг гонорарлари миқдори

Номи	Бир ойлик гонорар миқдори
1. Фанлар академиясининг ҳақиқий аъзоси (академик)	Энг кам ойлик иш ҳақининг 10 баравари миқдорида
2. Собиқ Ўзбекистон Қишлоқ хўжалиги фанлари академиясининг ҳақиқий аъзоси	Энг кам ойлик иш ҳақининг 10 баравари миқдорида
3. Собиқ Ўзбекистон Қишлоқ хўжалиги фанлари академиясининг мухбир аъзоси	Энг кам ойлик иш ҳақининг 7 баравари миқдорида”.